



13. august 2010

UKA 2010/52

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuu-na saqqummiupparput:

Kalaallit Nunaanni meeqqat inuusuttullu angerlarsimaffiup avataanut inissinneqartartut sul-linneqarnerisa nakkutigineqarnerat sukateriffineqaqqullugu Naalakkersuisut sulissuteqaq-qullugit Inatsisartut aalajangiiffigisassaattut siunnersuut.

(ATASSUT-ip Inatsisartuni ilaasortaataitai: Finn Karlsen, Siverth K. Heilmann, Knud Kristiansen)

Tunngavilersuut:

Meeqqanik inuusuttunillu ikiorsiisarneq pillugu Inatsisartut peqqussutaat nr. 1, 15. april 2003-meersoq kingusinnerusukkullu allanngortinneqartoq naapertorlugu ulloq unnuarlu paaqqinniffiit i-ngerlanneqarneri, aningaasatigut aqunneqarneri aammalu perorsaanikkut sullissineri pillugit Naa-lakkersuisut nakkutilliisussaapput.

Ulloq unnuarlu angerlarsimaffiit pisortat pigalugillu ingerlassaasa saniatigut suliffeqarfiit imminut pigisutut ingerlasut arlaqaleriartortut neqerooruteqartarput meeqqanik inuusuttunillu angerlarsimaf-fiup avataanut inissinneqartussanik inissiumallutik.

Taamatut ineriartortoqarnera ATASSUT-mit ippinnartoqartinnngilarput, taamaattorli aamma pi-ngaartipparput sutigut tamatigut qulakkeersimaneqassasoq meeqqat inuusuttullu angerlarsimaffiup avataanut inissinneqarsimasut sullinneqarnerisa pitsaanerpaatinneqarnissaa.

Suliffeqarfiit namminersortut amerliartortut meeqqanik inuusuttunillu ajornartorsiuteqartunik inisiivittut atorneqaleriartortillugit tamatuma ilutigisaanik inatsisitigut toqqammavigineqartut ersaris-sarneqarlutillu sukaterneqartarnissaat ATASSUT-mit pissusissamisooraraarput.

Eqqaamaneqartariaqarpormi meeqqat inuusuttullu angerlarsimaffiup avataanut inissinneqartariaqar-tartut inuunerminni aqquusaagaat imaannaanngitsuusarmata, allaallu meeqqat inuusuttullu ilaat im-minnut inoqatiminnullu ulorianartorsiortitsisinnaassuseqalersimasarmata, taamaammallu siunerta-qarluinnartumik aammalu qaffasissumik pitsaassusilimmik sullinneqartariaqartuummata.

Taamaammat ATASSUT-mit matumani minnerpaatut piumasaraarput makku naammassineqassa-sut:

- Meeqqanut inuusuttunullu ulloq unnuarlu inissiiivinnut piumasaqaatit sukaterneqassasut ersaris-sarneqarlutillu.
- Naalakkersuisut nakkutilliisussaataitanerat ersarissarneqassasoq.
- Peqqussut malillugu meeqqat pillugit paasisimasalittut qitiusumik ataatsimiititap suliassai ersa-rissarneqassasut.

Taamatut tunngavilersuuteqarluta siunnersuut Inatsisartunut suliassanngortipparput.